

摘藻堂四庫全書薈要

集部

欽定四庫全書薈要卷一萬九千九百六十

集部

宋文鑑卷三十七

宋 呂祖謙 編

詰

韓通贈中書令

劉 敞

易姓受命王者所以徇至公臨難不苟人臣所以明大節周故天平軍節度使檢校太尉同中書門下平章事侍衛親軍馬步軍副都指揮使韓通定交霸府委質前朝荷戈共歷於艱貞錫壤迭分於戎律朕以三靈睠祐

百姓樂推言念元勲方疇異渥蒼黃遇害良用憮然追
升浴鳳之池式表潛龍之舊

王贄授殿中侍御史

王禹偁

故事御史府三院轉遷各有月限考績之命異于他官
國朝以來不用此制必因行慶方得叙遷其間才行有
聞為衆所譽者不時而授人以為榮具官王贄本以懿
文輔之通識自登憲署繼領詔條潔已愛民所在稱理
司漕運者奏其課執風憲者舉其才受代南康陞見與

語宜從改秩用以勸能勉荷寵光勿渝素履

登州黃縣尉東方辛可密州司士參軍

歐陽修

朕以信示天下而以祿報有功今爾辛緣死事而命于
官然按察者糾失職而來有請按察吾所詔也不從則
不自信念功吾所急也不報則無所勸焉是用易爾散
秩優爾俸祿免爾吏責俾爾自安庶幾使吾信賞並行
而不失

西京左藏庫使內侍省內侍押班任守信可遙郡
刺史依舊廊延路駐泊兵馬鈐轄

歐陽修

國家自靈夏不賓邊隅多警議者率以謂用兵之道任
將宜專恩信不久則無以得士心山川不習則不可圖
勝筭自兵宿于野久而無功此殆將帥數易之患也苟
有能者無遽奪焉以爾具官任守信選以敏材臨于戎
事肅軍捍寇宣力有聞遽以飛章自言滿歲顧久親於

矢石豈不念於勤勞然而士卒之樂既汝安夷狄之情
惟汝熟雖欲代汝實難其所宜旌以郡章仍臨舊部
體茲委寄服我茂恩

前杭州司理參軍范袞可衛尉寺丞

歐陽修

朕觀兩漢名臣多或出於丞史小吏非夫丞史之能出
名臣也乃知古雖吏屬亦必選用賢材焉今中書丞相
之職比古公府曹掾之制吏員已為簡闕欲任其事豈

不擇人故詔銓衡俾其慎選具官范袞有司來上以爾
為材進爾諸丞往率乃職古人可慕無自怠焉

前知彰信軍節度判官褚式可太子中舍致仕

歐陽修

昨按察者言爾事有迹而爾方以老自請吾屈言者不
究而進爾以秩全爾之歸吾之欲成人之美而不欲成
人之惡如此汝其休矣知戒之仁

虞部員外郎呂師簡可比部員外郎

歐陽修

國家嚮因寡兵特立賞格俾勸勤者速於集事而議者皆患應募之卒雖多而難用豈夫訓練之未至將由簡閱之不精然而號令重於已行賞罰貴乎存信今有司按籍言爾當遷往服新恩其思實效

潁州推官江楫可大理寺丞

歐陽修

朕思與多士共寧庶邦而賢豪材美之人或自沉於幽遠與夫懿節茂行之韞于中而未見於事者吾皆不得

而徧觀焉故以舉類之科而為官人之法今舉者言爾
行可稱命爾新恩以期後效

進納人空名誥海詞

歐陽修

官者所以治人而非以假人之器也朕閱西人之勞而
欲紓其乏有出其私以佐吾之用者是亦有益於吾民
俾命于官所以示勸爾其往矣服我茂恩

著作佐郎張去惑可秘書丞

歐陽修

國家設官之法患乎巧偽干譽者之難止故考績之格

三載而一例遷所以使沉實守正之人得以自進及其
弊也庸人希累日之賞而賢者不能自別故又增舊法
稍欲因舉類而求能者焉惟爾之材世所稱美夫累日
而遷非爾志干譽而進不可為惟思厥中務廣其業

永興軍節度推官董士廉可著作佐郎

歐陽修

自古奇偉之士因時立功而名在竹帛者率皆不以細
文常行責其備蓋於其大者人有所不能者焉惟爾少

而好奇不苟小節喜從兵事思奮其材今積久錄勞蓋從請者若夫異賞待爾有為

內殿崇班郝質可內殿承制

歐陽修

夫被甲馳馬出而與敵周旋於原野搴旗斬馘歸而與士卒數俘獲于軍中量功較計蒙褒被寵進而受賞于朝廷此將帥之事也豈不榮且樂哉戰之功有小大國之賞有重輕膺此茂恩更期後效

龍衛指揮使并贊拱聖指揮使胡元並可內殿承

制

歐陽修

朕之勁兵銳將戍于邊者不可勝數惟爾能以武勇出
乎其間方吾思得猛士之時吾之大臣以爾來薦高爵
厚祿為爾等而設也往其勉矣吾將觀汝之能

秦州觀察支使喬察可靜難軍節度推官知隴城
縣

歐陽修

夫吏之不能稱職者或謂數易使之然今爾嘗佐於州
就臨屬縣其上下政令之便及士風民俗之所安皆所

習知可以為治將觀汝績無替其勤

試助教郭固可寧州軍事推官

歐陽修

自邊陲用兵而天下游談之士趨時蹈利者吾非不知其濫而未始怠焉者冀必有得於其間惟爾之能乃其素學夫學有實者詰之不窮而推之可用嘉汝施設精而有條慮變適宜將觀汝用

范仲溫可台州黃巖縣尉

歐陽修

爾弟仲淹參吾大政方欲輔朕平賞罰推至公以修紀

網而正庶位爾今所任有土與民惟過與功別有賞罰
爾勤厥職可不戒哉

史館書直官潘宗益可梓州司戶參軍

歐陽修

給事有年其勞可錄宜命以秩俾旌厥勤凡為有司惟
久則習尚安乃職以謹克終

內殿崇班李允恭可內殿承制

歐陽修

朕患州縣之吏不職者不能禦姦禁暴而憫吾民罹於

賊盜故於捕盜之吏推賞尤厚非以為私蓋有為也今
爾之請自陳其勞方吾以賞行勸之時惟恐不及故加
爾寵非徇爾私夫古有讓功不言之賢惟爾宜慕

彰武軍節度推官李仲昌可大理寺丞簽署渭州

判官事

歐陽修

群材之在下者思達其上難矣而在上者思得可用之
材豈為易哉朕頃自擇能臣使舉其類而洙以爾克薦
今琦又以為言琦洙皆能體吾勞於擇士之心者舉爾

不應不慎霈然推寵吾所不疑爾尚勉哉以稱茲舉

泰州興化縣主簿朱思道可衛尉寺丞

歐陽修

夫廉為吏之一節也今保薦之法惟以受財為同坐則待夫能吏豈盡其材爾其奮厥所長思有所立不獨守夫一節而已焉

京西轉運按察使虞部員外郎杜杞可刑部員外

郎直集賢院充廣西轉運使

歐陽修

自一隅用兵而調發輸役之繁無遠不及況廣東西之路於東南尤為遠者而吏多不良吾之疲民既有賦歛之勞而今又罹盜賊之患吾一慮及為之惻然凡與吾憂國者豈遑暇於安居哉汝為吾往其可憚勞吾又嘉汝名臣之後好學博文尚有榮名以為汝寵凡吾寄汝之事繫汝之材吾惟責成爾可自勉

河北都轉運使工部郎中張盥之可兵部郎中克

天章閣待制三司戶部副使

張方平

唐自開元以還王室多故行在之所不能簡官而從軍興之期顧多應卒之事爰從權便置諸使而天下庶政始不歸於尚書省今之會府乃在三司蓋自中臺至于寺監之務凡關出納無不總者故建其長以治要立其貳以治凡設其攷以治目以言乎三司之副是猶文昌之丞輅助上率下舉綱振目常出高選以贊大計具官張盥之才識器用政事風采稱于朝廷著于方面今邊候多警戎車未脫凡物力之克屈繫生齒之耗登職司

版圖必藉精力故謀于衆還爾外臺尚悉乃心以集吾事

前秀州崇德縣尉左惟溫可漣水軍錄事參軍

劉敞

天下無事人得養老長幼修孝悌之行甚善而猾惡民起為賊盜奪攘以侵擾之郡縣所患者也汝以邑尉捕擊如律尚書條上閱閱遷爾糾曹祇服明命益思自奮太常少卿張鑄可光祿卿致仕

劉敞

古者有司年至則致仕所以恭讓而不盡其力也具官
張鑄履尚夷粹足以檢俗精力強敏足以濟物而能顧
禮畏義願上印鼓朕閔勞以官職之煩今聽其請夫佚
老之士雖不輸力於朝其矯厲風節不亦過絕保祿持
寵不知止者乎俾列九卿以榮其歸祇若休命思底終
譽

無為軍錄事參軍馬易簡可太子中舍致仕

劉敞

控搏祿利者至於遷籍損年飾貌匿衰以緩退休之期
爾齒未耄仕無缺行能決於去庸非廉乎自下郡掾升
東宮屬歸安鄉閭足為榮觀矣

龍圖閣直學士兵部郎中涇原路經略使王素可
諫議大夫

劉 敞

朕臨御天下賴宗廟之靈方內乂安元元蒙福而往者
戎狄窺間緣隙時入為暴患皆在守圉之臣文不能附
衆武不足威敵使貪暴之民震驚朕師具官王素假節

剖符居邊三年內鎮撫百姓外教戰士令行禁止惠于
鰥寡爰及疆外羈縻之虜咸懷服集不失朝貢中國以
安朝廷益尊此蕃衛之勲也詩不云乎大邦惟翰其議
遷秩升于諫列以慰吏士出車東山之思

太子中舍通判衡州張允可殿中丞

劉敞

郡有倖貳闕決衆務所以優民事示重慎也俗吏不察
大體而矜勢怙權以爭重輕吏民反苦之甚非朝廷意

爾居職自若奏課亦善通籍循省以疇歲勞方天之休
其勛哉

前邠州觀察推官李育可著作佐郎前趙州軍事
推官許林宗可大理寺丞

劉敞

古之禮珪璋特達而璧琮有藉寶非不同也所從用之
異豈唯寶哉士亦宜然育用文學進有以自見林宗繇
吏材選稱於知己夫蓬丘圖書之府廷尉法理之本往
為之屬各踐爾位思所以報毋隨而守

皇姪右監門衛將軍克孝妻某氏可封仁和縣君

劉 敞

常棣之詩其輯之亂曰宜爾家室樂爾妻孥知其為治
內之本也今夫宗婦則有湯沐之邑封君之號此其所
以稱宜且樂不亦光大章顯乎具官克孝妻某氏憑慶
良輿作嬪懿近柔靜之操足儀閨壺莊肅之風能承祭
禮俾疏列壤且擇令名尚無懈於夙夜思能對於休寵
西京左藏庫使忠州刺史高陽關路駐泊兵馬鈐

轄時明可文思使

劉敞

執干戈典兵馬之臣當以戰多勇功受賞於朝而但累
歲月計資考以此取高位壯士之耻也然今天下又安
士無所試其能故偏裨將帥例以恩進遷爾使列以觀
來效爾亦毋謂易而得之因易而守之蓋亦竭節顧義
思所以報國者乎

宰相富弼奏試國子四門助教王淵宰相韓琦奏
鄉貢進士李常並可試將作監主簿

劉 敞

曩者朕親祀清廟推恩延賞而大臣得薦其門下之士
置之仕籍今丞相以常等聞夫與我陶冶萬物長育人
材者非丞相歟何惜一命以慰士大夫之望其慎所履
毋辱已知

內殿崇班唐詢可內殿承制

劉 敞

邊吏欲其奉法守職以安吾民而不欲其徼功興事以
撓王略也故歲滿無負者輒遷其秩爾有治狀協于賞

格進承制命無隳常守

定武軍節度推官衛觀可大理寺丞常州團練推

官沈披可衛尉寺丞

劉敞

昔唐有天下諸侯自辟幕府之士唯其材能不問所從來而朝廷常收其俊偉以補王官之缺是以號稱得人今州郡從事皆吏部旨授然其試之臨政而不苟察之行已而有立亦皆一時之選已故吾亦且命以九卿之屬使漸而升於朝觀與披也既厯試於外又亟稱於知

已得人之聲庶必能勉焉

翰林學士給事中知制誥歐陽修可禮部侍郎端
明殿學士吏部侍郎宋祁可尚書左丞禮部郎
中知制誥范鎮可吏部郎中刑部郎中知制誥
王疇可右司郎中三司度支判官太常博士集
賢校理宋敏求可祠部員外郎並依舊職任

劉敞

古之為國者法後王為其近於已制度文物可觀故也

唐有天下且三百年明君賢臣相與經營扶持之其盛
德顯功美政善謀固已多矣而史官非其人記述失序
使興壞成敗之迹晦而不章朕甚恨之故擇廷臣筆削
舊書勒成一家具官歐陽修宋祁創立統紀裁成大體
具官范鎮王疇宋敏求網羅遺逸厥協異同凡十有七
年大典乃立閱富精覈度越諸子矣皆鑒有有功朕將據
古鑒今以立時治為朕得法其勞不可忘也皆遷秩一
等布其書天下使學者咸觀焉

禮部侍郎參知政事曾公亮可加正奉大夫進封
開國公食邑五百戶賜推忠佐理功臣

劉 敞

朕承七廟之光繼三聖之緒惟慎祀時享未足副盛德
委事有司未足盡誠孝故稽曠典厯吉日親率公卿躬
執豆籩昭見祖宗並受祉福若乃衰時之對申錫無疆
天寓之內莫不受獲而况一二耄老肅雍顯相者乎具
官曾公亮德器渾厚智謨闕遠予欲觀于雅頌參元鳥

清廟之詩以追孝于前入汝明予欲謹于王事極四海
九州之美以徇物于大饗汝圖予欲時和年豐以薦厥
嘉生登黍稷之馨汝翼予欲制禮協樂以對越太室交
神人之雍汝助夫賞國之典不可廢也進階中朝頒爵
上公衍食加田勒忠甲令使百執事粲然皆知輔德致
治之報焉不其偉歟

將作監林洙可司農卿

劉敞

自周以來稷為大官今吾非廢稷不務也而官益輕豈

居其職者未能勉乎具官林洙資稟通裕臨履修潔擢
正卿位尚宜其事昔乃先正實領大農之任以迪文考
今年穀未克邊人望哺爾其勤身敏行無忝名實於以
勸穡劬民庶有賴焉濟爾世矣不其多乎

權郴州軍事判官楊永可右贊善大夫致仕前岳
州平江縣張正已可大理寺丞致仕

劉 敞

年至還政典也而貪祿者或不能止能止者皆好禮者

也至於以廉自嘉者有不待年去矣今永也禮而正已也廉忽而不錄何以慰其子弟之心或升籍朝閨或承事卿寺歸榮鄉閭以樂暮齒

宋文鑑卷三十七

欽定四庫全書薈要卷一萬九千九百六十一

集部

宋文鑑卷三十八

宋 呂祖謙 編

誥

都官員外郎邢夢臣可侍御史殿中丞沈起可監

察御史裏行

劉 敞

御史執憲轂下紀綱國體非雅亮勁正之士不足參論
議廣聰明拯與景初吾所信也使之慎柬厥僚必皆其
人而極也以此聞景初也以夢臣可稽之閱閱察之望

譽人咸曰允哉予甚嘉之夫鑑以明故可正容繩以直故可形枉毋勤小補而遺大體毋忽近務而墮常守事君盡禮其可以報知己乎

兵部員外郎張中庸可開封府判官

劉敞

京師衆大之居其俗具五方而諸侯所視法也號稱難治蓋自古記之為之尹者專用擊斷則網密俗敝崇之以寬則威信不立故常擇精明疏通之人以參其職具

官張中庸材劇而用博行修而志堅處煩決疑必有餘
裕俾贊浩穰之政當適寬猛之中根本之地爾惟欽哉
屯田員外郎胡揆除都官員外郎 劉 敞

朝廷鎮撫四夷以綏中國貴於息民而不務佳兵故常
申救邊吏毋邀奇功五嶺已南蠻夷雜居其俗剽悍尤
為易動而桂州一都會也前通判軍州事尚書屯田員
外郎胡揆承用詔旨悉心疆事終揆之任恬然無虞亦
可謂善吏能宣明威信者矣夫守邊之患常在見小利

而不達大體以侵迫驅奪之為故至大亂貽憂吾民則若揆者不可以不賞也稍增其秩以示褒寵

度支郎中李碩可三司戶部判官 劉 敞

財賦大計一出於民取之寡則用不足然而民逸取之多則用有餘然而民困此三司之難也術不能通輕重智不能調盈虛則吾不以為人僚具官李碩常以名字典郡風采奉使敏以為政精於檢下所到而治有迹可紀使之參計耗登贊舉籌策庶可以不傷財不害民乎

往即會府毋乏乃事

陝西路都轉運使兵部郎中天章閣待制傳求可
右諫議大夫河北都轉運使工部郎中天章閣
待制周沆可兵部郎中依舊

劉敞

岐畢吾西土也被山帶河百二之險而有昆夷之虞燕
亳吾北土也平原廣牧四戰之地而有獫狁之警瞻足
兵食綱領郡縣將命宣指甚難其人具官傳求明智敏
察表以文雅具官周沆深中篤厚居以名檢並委節傳

分按州郡皆有述職之勤美俗之風夫較考陟明其來
尚矣或正諫省之列或遷夏卿之屬所以褒善勸能爾
其欽哉

司門員外郎張輦可開封府推官 劉 敞

京師者舉衆大之辭名之者也風俗雜而獄市繁治稱
浩穰吾今襄為尹急吏緩民甚有文理其僚虛席思得
敏才以左右之具官張輦嘗使行河決川滌源衆工胥
作輓漕以通其精力幹用效在已試俾贊輦轂之政尚

克有立夫都邑翼翼四方是則無習苟且違道干譽則
予一人汝嘉

曹願叔克天章閣待制知福州

蔡襄

朕念善為維持之策者運天下如臂使指欲其大小相
臨而威令必達故也東南之郡長樂都會表山環海地
險而遠八州生衆繫乎總帥非有幹明之資能辦吾事
者不可以遣具官曹願叔智力精敏應機必決荐更器
任籍有聲稱將漕益部還貳計省而猥繁之務罔不給

肅今屬以方面之重寵以延閣之華爾其繕除兵械補完城堞懷綏困窮剪遏兇猾使吾人無愁苦之嘆朝家有專倚之賴朕志唯是爾儀圖之

張盥之可光祿卿致仕

蔡襄

朕於群臣進退之際曷嘗不緬然思之方其強仕發智能以濟務則有官賞以楙其材逮其謝歸養志意以自佚則有恩渥以寵其行仕宦者豈不雍然得其所耶具官張盥之立節清峻無緇磷之苟臨事明敏有批導之

利恤民以惠屏奸以嚴循吏之風聞于當世自升禁近之列屢委宣藩之重服老聃之言而知止躡踈廣之迹而告老爾其還上官事秩以列卿休于而家尚體朕意
王元可右衛大將軍遙郡觀察使 胡 宿

閫制之師蓋威於不若巖除之衛乃備於非常唯中外之選更在倚毗之兼厚具官王元才資沉敏節尚剛嚴少厲武鋒博通軍志幹方授任政屢服於藩方厭難折衝功實施於邊境眷言雍部控于西州委以牙爪之師

屯乃襟喉之地苟慝不作部分有嚴閱牘奏之爰來叙
足腓之微苦願寘環衛乞朝京師須藥石之有瘳雖金
革而無避忠言可壯誠實不誣朕以拱扈之嚴當資於
宿將察廉之任用寄於舊勲遙總十連聯司二衛式表
䟽恩之數且伸從欲之仁惟忠力之是圖亦威名之斯
賴體茲優遇更竭乃誠

皇姪右衛大將軍岳州團練使某可起復舊官

泰州防禦使知宗正寺

王安石

先王糾合宗族而分職以治之所以嚴宗廟也宗廟嚴則禮俗成而天下治其事豈可以輕哉今朕選於近屬以修宗正之官亦先王治親之意也以爾具官某惠仁孝恭忠信純篤故遷厥位以稱禦侮之實而使任事焉夫士之欲施於政未有不學而能者學所以修身也身修則無不治矣朕言維服爾往懋哉

起居舍人直秘閣同修起居注司馬光改天章閣

待制

王安石

揚雄曰周之士也貴秦之士也賤周之士也肆秦之士也拘蓋言先王以禮讓為國士之有為有守得伸其志而在上不敢以勢加焉朕率是道以君多士以爾具官司馬光文學行義有稱于時故明試以言使司告命而乃固執辭讓至于八九改序厥職以伸爾志是亦高選往其懋哉

左司諫王陶可皇子伴讀

王安石

自天子至於士未有不待學而成者今朕欲進諸子於

學求可與居者而大臣以爾為言爾久在諫垣有聞於世茲惟慎選可不勉哉

范鎮加修撰

王安石

昔周人藏上古之書以為大訓而孔子春秋天子之事也蓋夫討論一代之善惡而撰次以法度之文章非夫通儒達才有識足以知先王不欺足以信後世則孰能託尚書春秋之義勒成大典而稱吾屬任之指乎以爾具官范鎮有該通之材有純潔之操辯論深博溢於文

辭論思禁林時議惟允則夫按善惡見聞之實斷是非
去取之疑人之所難宜以命爾爾其精思熟考自勉以
古之良史而毋襲近世比事屬辭之失使無以考焉

高旦可著作佐郎

王安石

唐虞以三考黜陟幽明而其所命或終身於一職然則
其所謂陟者蓋爵服之加而已今之增位猶古之加爵
服也以爾久於職事而功用應於有司之法故使增位
以報焉雖考績之歲月與黜陟之法古今不同而吾所

以褒勵庶工非與唐虞異意爾其毋怠思稱厥官

德妃沈氏姪孫獻卿可試大理評事

王安石

朕於后妃之家不欲以恩撓法法之所當得者義亦無所愛焉爾方眇然未克有知而以外戚之恩得試理卿之屬時乃邦制不為爾私勉哉有成以待官使

沈德妃姪授監簿

王安石

京官吾所重也故設磨勘之法以待吏部之所選非有

勞而無罪及有任舉之官則不可以得之爾由外戚以孩幼入官得吾之所重其強勉學問求為成人以稱吾待爾之意

磨勘轉官

王安石

有司考爾等之閔閱而揚爾等於朝廷朕親覽焉皆應遷法夫命官賦祿之事朕非輕之也維以章有德序有功名在審官則三歲而一遷亦維以閔夫職事之勞而勉之盡力爾等勿謂名器之可計日以自取也而無報

上之意焉

王伯恭轉官

王安石

方今仕於朝廷者率三歲而一遷論者患其不足以勸功然日月久矣能祇慎不怠免於罪悔則亦宜有以褒嘉此朕所以使爾得遷之意也士之為義蓋有常心何必利焉然後知勸

甘昭吉入內副都知

王安石

古者王之正內必有任職之臣予若稽古而思得吉士

以克其選以爾服勤左右多厯歲年有專良之稱無側媚之毀其使序于正內以昭廷論之公焉爾其審門闥謹房閤入宣宮令出贊朝事悉心夙夜一以忠信則維予爾嘉爾亦永綏寵祿

崔暉刑部侍郎致仕

王安石

仕焉而告老者自一命以上必有以慰其歸況吾邇臣恩紀所厚宜增位序以示褒優以爾具官崔暉比以明揚久於煩使入參侍從出備藩維踐更滋多寄屬惟允

引年辭位得禮之宜進貳秋卿以榮居息古之仕者非
苟自佚其身唯慎行祇法以助成王德爾所知也往其
懋哉

皇兄故保康軍節度觀察留後承簡可贈彰化軍
節度使追封安定郡王

王安石

樂其生而哀其死欲其富貴之無窮仁人於親戚莫不
然而王者得盡其褒崇之意具官承簡於宗室為近屬
於朝廷為大官有溫恭恪慎之稱無驕嫚逸欲之過不

幸至於寔宥用震悼於朕心義無親賢恩禮當稱今夫
建牙樹纛節制一軍而封爵至於稱王人臣之極也朕
其追命以賜焉尚其有知享此休顯

參知政事歐陽修曾祖某贈某官 王安石

君子善善之義下及子孫況推而上之至其祖考所以
褒美崇寵顧豈可以不稱哉故先王宗廟之制視其爵
位之高下以為世數之遠近而本朝追命之禮亦從
其子孫名數之卑尊具官歐陽修曾祖潛于丘園躬有

善行畜積之慶施于曾孫為時宗工名重天下圖仕以
登于右府褒嘉當及其前人東宮之孤位已顯矣進秩
一品尚其享哉

曾祖母某氏某國太夫人

王安石

尊之欲其貴親之欲其富豈特人主有是心哉推是心
以施於人此人主所以與天下同憂樂之意也祿有厚
薄故禮有隆殺位有高下故施有遠近古之道也其可
忘哉具官歐陽修曾祖母舍德在躬作嬪令族積善之

慶覃其後昆惟時聞孫實朕良弼登豫政事人無間言
其疏大邦之對封以報流澤之施寵維靈之極尚克享
哉

祖

王安石

為吾政事之臣所以崇寵之者備矣於其尊大前人之
志亦宜有以稱焉具官歐陽修祖某積行在躬潛而不
耀畜其善慶以賴後昆厥有聞孫為朕良弼典司機要
海內所瞻追命之榮至于帝傳進登師位以極褒嘉尚

其冥靈膺此休顯

祖母

王安石

朕䟽郡縣以君諸臣之母欲以稱慈孫孝子之心至於
政事之臣則封國及其王母所以望其功者厚矣則慰
其心者顧可以薄哉具官歐陽修祖母來嬪名家克配
君子積善之福覃于其孫左右朕躬豫國政事嘉而有
後錫以大邦維靈在幽尚克膺此

父

王安石

大臣得爵命其先人至乎公師非古也然禮者人情而已矣當於人情而義足以勸士則何必古之有哉具官歐陽修父某蓄其德善不顯於世克生賢佐為朕股肱東宮一品人臣高位追以命汝用嘉有子尚其享此以稱宗祀之盛哉

母

王安石

古者子為諸侯大夫而父為士則其祭以諸侯大夫之禮朕以謂得享其禮而位號不稱則不足以盡孝子之

心故今有列於朝廷皆得追崇其考妣又況為吾左右
輔弼之臣哉具官歐陽修婦順母嚴稱於天下能教其子
為時名臣協于詢謀進斷國論雖祿養不及而饋享有
加啓封大邦於禮為稱尚其幽窆知享此榮

樞密使張昇所生母

王安石

傳稱春秋之義母以子貴說者或非焉而人子之愛其
親豈有窮哉已則富貴而親不與焉固人情之甚可哀
者也當有追崇之禮稱其思慕之心具官張昇所生母

溫柔惠和得婉君子克生賢佐為朕寶臣允于庶言秉
國樞要追崇之典既啟爾邦其改新封以鴻後慶尚其
冥漠享此恩榮

三司使禮部侍郎田況可樞密副使

王珪

天文三階中躔紫極之位國事二柄右列鴻樞之司維
君臣之謨明有夙夜之基命朕當登進時傑贊襄大猷
以導萬微之中以合九德之會匪至公之進曷群聽之

歸以爾具官田況器懷閎深業履端厚材適國家表裏
之體學貫天人精稔之交而自高賢冊於大廷儀峻遊
於清路西垣名命之粹內閣論思之勤擁帥節于邊而
天聲愴於殊俗筦財柄于內而國用豐於厯年茲庸倚
爾忠力之良置諸宥弼之地熙我大業垂之亡窮噫本
天下之兵莫重安危之寄在常右之陟有若臣隣之榮
蓋德懋者寵所隆任大者責亦至勉思盡瘁永克承休

屯田郎中詹庠可都官郎中

王珪

治世俗厚賢能衆多其高材異行則待以越次之位而
守職奉法亦褒累日之賞非有厚薄理則然也爾服于
朝著陳力事任有司稽年書閔應陟其增一秩以慰夙
夜浚明之勤往服休命勿忘祗飭

戶部副使太常少卿燕度可右諫議大夫知潭州

鄭獬

湖湘之南溪蠻剽悍而易擾陸而馴之則亦弭伏苟其
失御遂出而噬邊其禍亦不細得無肅又廉治之帥為

之良牧者哉以爾具官燕度醇明忠厚通於世務更存
要劇芒刃愈出俾副大農厥功茂焉宜加賜諫議大夫
魚符犀節往甸南服內以惠斯民外以柔殊俗朕方端
宸面朝以遲爾之奏課矣

劍南節度推官張士澄等可大理寺丞

鄭 獬

萬官之才豈朕一耳一目之可盡之哉然而卒所以能
盡之者寄朕之耳目於獄牧連帥推而進之耳維汝修

方宿業以廉治自顯薦牘交上可勿聽乎宜寵以廷尉丞以示我擇材之公

皇姪右監門衛大將軍仲郤可依前右監門衛大將軍黃州刺史特封齊安郡公 韓維

朕按屬籍以觀祖宗之世而陳王之後獨微顧其位不章顯朕甚憫之以爾具官仲郤孝友惇謹善守法度爰命褒錄以鴻厥慶刺史重任也郡公高爵也遙領紹建茲謂顯休噫惟務學可以正己惟率禮可以保位汝其

懋哉

賴王府翊善守太常少卿直昭文館齊恢可守尚
書左司郎中依前直昭文館兼太子左諭德諸
王府記室叅軍尚書司封員外郎直集賢院陳
薦可工部郎中依前直集賢院太子右諭德

鄭獬

唐制左右諭德掌諭太子以道德其內外庶政有司為
規諷者隨事而贊論焉則處其官者其選可以不重哉

以爾恢清謹廉正不失其常以爾薦實直和厚可任以
事而或入道經訓或贊為書記使王有聞繫爾能力屬
儲闈之聲啓擇郎曹而並進夫語道者非序而安取論
德者惟行之為艱毋或易言以墜予訓

西頭供奉官常用之可右清道率府率致仕右侍

禁李襄可率府副率致仕

鄭獬

古之仕者量其可任則受至于不能而止所以遠殆辱
也朕嘉斯人之徒故於謝事而歸者必增秩以遣之往

欽茂恩以安末路

台州寧海縣令魏昂可試大理評事克山南東道
節推知劍州劍蒲縣

沈文通

前日天下令長多非其人始詔刺舉牧守之臣察廉
為之故遠近之縣十七八治朕甚嘉之汝其選也汝既
三歲被代而知者尚鮮何哉雖然不可不少褒也其升
職幕府復為百里益有以薦于朝者當命汝遷焉

內東頭供奉官廖浩然可內殿崇班

沈文通


禁閭小臣衆矣非以德舉而材選也特以給左右之役
導內外之事而已故未嘗輕命以遷所以異乎吾外廷
士大夫之典也今爾考不幸乃有遺封以爾為請朕念
爾考事我之久位于通顯汝亦謹信無咎故進汝之秩
班于殿朝以為汝寵朕於汝父子可謂至矣其思所以
報我者焉

都官郎中楊佐可司封郎中

沈文通

水之為利害也甚矣堯舜其猶病諸故厯代建以為官
莫之能廢而朕用稽焉惟爾佐學行材智廉正膚敏實
吾士大夫之望而自領都水出入累歲夙夜盡瘁具有
厥功朕甚嘉之故因有司大比之叙陟爾左曹之正以
為朕寵其往宿爾業愈獻厥成則亦當有以稱爾矣欽
哉

宋文鑑卷三十八



總校官庶吉士 臣 張能照

校對官中書 臣 胡紹基

謄錄監生 臣 張若湘

欽定四庫全書叢要

集部

宋文鑑卷三十九至
四十一



詳校官候選知縣臣吳甸華

欽定四庫全書薈要卷一萬九千九百六十二

集部

宋文鑑卷三十九

宋 呂祖謙 編

詰

西京左藏庫副使楊文廣可供備庫使

沈文通

前日南夷負恩為亂以覆壞我郡邑至於用師而後定
雖朕不德不能懷服方外而亦將吏不戒不習之罪也
故深察往失而推擇所遣益不敢輕惟爾文廣材武忠

勇更事有勞故令以爾總一道之兵戍于邕管又陞爾
于諸使之正以重其行爾其祇聽朕命戒疆事習軍計
使南徼無警而朕為知人則時乃之功矣其往欽哉
西京左藏庫副使高允元可文思副使

沈文通

武吏以材勇進以功力賞古之制也方天下無事兵革
不試則汝武吏安得自效以取賞哉然內外之職歲月
之勞亦不可遺也今允元最狀既應陟法其增秩一等

以明勸群吏

屯田員外郎王袞可都官員外郎太常博士杜保
衡可屯田員外郎

沈文通

朝廷治定士大夫幸當其時而進於位以周旋乎太平
之政豈非休哉然患常生乎久安而因循苟簡之弊不
能無也在乎彊勉而已矣詩曰夙夜匪懈書曰懋哉懋
哉今有司弊三載之治故各增爾秩一等其各往服祇
我明訓思有攸立毋自致戮敗

徐鐸張崇翟思太學博士

曾鞏

博士列於成均以講教為任爾以經明選用往服厥官
蓋尊其所聞以誘率學者汝之守也其尚欽哉

徐禧給事中

曾鞏

有事殿內之臣職在於平奏述詳命令糾其違者而正
之覆其是者而行之至於決獄官人條陳法式之事莫
不當考察焉其任可謂重矣具官徐禧以材進拔典執
邦憲茲用推擇俾踐厥位惟精敏不懈可以周閱讀惟

忠實不撓可以司論駁朕方觀爾之效爾尚慎於厥修
吳居厚京東轉運副使呂孝廉可轉運判官

曾鞏

朕進拔能吏以督視一路蓋州縣政令之舉措公私貨
食之歛散莫不任焉得人之難攷擇惟慎以爾幹敏閱
試惟舊用是分茲東部屬以使事夫施於民者厚而刑
罰清求於民者約而財用贍使德流澤通而風化輯揚
以稱朕憂憫元元而勵精庶務之意爾其勉矣往服訓

辭

王從伾知奇嵐軍

曾鞏

崇築培壘本以輯治軍旅及四方既平而假守之臣實任民事列於有土之官矧嵐谷並邊寄屬尤重爾以選擇往祇朕命夫能開示恩威以惠養吾人而懷附異俗則為善於其職尚思爾守無替訓辭

崔象先等帶御器械

曾鞏

乘輿所在供御之物無一不備具者故鎧甲弓矢屬之

以從者亦不去於側非左右親信惡足以任此哉爾給
事惟舊宜就茲列益思祇恪以稱厥官

尚書祠部員外郎知制誥直學士院孫洙可翰林
學士知制誥

李清臣

以文辭為號令明諭朕志于天下者在制誥陳古今論
得失裨朕之欲聞者在訪議二者皆學士職之故於侍
班為親且貴以爾具官孫洙繇學術行誼顯進有名于
時博習墳史多識典故代予言訓蔚然可觀真秩禁林

使與材稱恩寵茂矣爾慎旃哉

劉永年克殿前都虞候燕達克馬軍都虞候苗授
步軍都虞候

李清臣

左右虎賁之士與羽林設騎材官蹶張皆天下拳勇之
秀以嚴宿衛厲武節也既命帥分總之而虞度兵計候
司戎事亦統護之貴職豈輕任其人哉以爾官某威行
軍中名動疆外材稱所付忠忘其私乃俾次遷以補督
將之缺予命休顯汝思報焉

翰林醫官尚藥奉御王永可依前尚藥奉御直翰

林醫官

李清臣

凡方技有益于人者皆以備王宮之一守而爾原診察
色稱為明習稽勤序課遷爾之秩其益勉哉

中大夫守尚書右丞李清臣可太中大夫依前守

尚書右丞

王震

朕初繼承大賚于天下雖汪洋之澤所被者廣要以貴
賤遠近為先後隆殺之節故吾政事之臣所以褒嘉者

既不敢後而致隆焉具官李清臣秉德含章將明密勿
先帝圖任以貳政幾弼予一人與有勤績徽章爰錫祿
秩有加進陟勲資益陪帝賦終審厥與爾則有辭惟予
一人並受多福

朝奉郎蘇軾可守禮部郎中

王震

爾議論文章卓然名世而失職浸久所學未伸今茲命
爾為郎以待不次之遷孔子曰如或知爾則何以哉維
爾之才不患無位

朝散郎勾當京東排岸司胡及可依前官權發遣

開封府推官公事

王震

開封專理京師非有二輔亂其治也獨僚屬盡才則裕無事矣吾比不輔其缺使得自擇所宜顧以爾聞殆必如舉往其協义咸底于休

通直郎河北西路提刑呂溫卿可依前官克河北東路提刑奉議郎河北東路提刑呂仲甫可依前官克河北西路提刑

王震

朕析河朔為兩道而各置使者蓋祥刑惟察非若財臣之欲周知而移用也揣權稱事其任惟均立易攸司咸祇厥守

通直郎著作佐郎豐稷可權發遣提舉利州路刑獄公事

王震

爾以儒學有聞而頗稱澹默試之蒞事其殆不煩度此祥刑訓于厥屬若予欽恤爾則有辭

朝奉大夫少府少監呂希績可權發遣潁州

王震

今之郡守及唐刺史郎官出入之資也爾以選擇入省
故出得善州夫愷悌之政非文深吏所能成也唯爾懋
哉務稱吾意

朝奉郎行宗正寺主簿楊完可權知衢州

王震

遠州刺史吾所加擇顧爾以求得之知爾能成愷悌之
政也雖然吾可謂體群臣矣傳曰體群臣則士之報禮

重爾可不勉哉

左藏庫使趙諒可供備庫使供備庫副使王繼恩
盧昭用可並西京左藏庫副使內殿崇班楊貴
田珏張僅可並內殿承制

王震

新城之役調卒於他道而在行者爾實總之部分嚴整
弗怨弗咨于是勞還宜有寵慰率遷官秩各服恩榮

皇姪右千牛衛將軍士儔皇弟右千牛衛將軍叔

媽可並右監門衛大將軍

王震

宗子無職事之勞而有考績之法者親親之恩欲有加而無已也然非廸教飭身則弗應有司之格衛府之師浸富貴矣往其祇哉

朝請郎權發遣陝西運副葉康直可朝奉大夫再
任承議郎權發遣陝西運副李察可朝奉郎再
任
王震

朕惟西土弗靖爾則在行靡征不從日月逾邁典護邦計實繁厥勞練達邊機毋易爾舊宜加寵陟申即故封

有功見知其說毋數

故內殿宗班劉景男可奉職

王震

有臣不難殺身以報國賞其可薄乎顧死者已矣殆祿其近屬尚為之旌勸永惟乃父之忠勞爾是以有祿可不勉哉

朝請郎吳安度等故母廣陵郡太夫人王氏可贈
榮國太夫人

劉放

邦君之德具鵲巢騶虞之化孝子之思有凱風寒泉之

感哀榮之典兼備愛敬之治維廣追崇懿行奚恤光寵
朝請郎吳安度等故母王氏輔佐君子挺幽閑之操宜
其家室備均一之美遺芳未泯積慶方厚舉集門風伯
仲幾乎萬石疏恩郡治湯沐近於百邑爰因合宮之祀
申錫漏泉之澤俾封成國仍付榮名禴翟有光壤戶知
貴

殿中侍御史豐稷可右司諫

劉攽

在廷之臣位下而望重者唯諫官而已為其得廟切人

主紀綱國體也然非學足以達道其智足以周務見微而知著擇善而有容亦安能稱其事而宜其官哉以稷自居憲府綽有士譽名不虛傳材實允副移珥筆之權當伏蒲之選謹言正色廼其素守吐剛茹柔毋愧前哲則我為知人爾號稱職矣

皇叔祖保信軍節度使宗隱男仲硯等可並太子右內率府副率

劉放

公族之子屬近愛至未及有知膺受光寵非以祖廟之

隆慶朝家之敦叙邪副率之貴是維通籍勤身戒事以
就長立

左藏庫副使純昱可權知廉州

劉放

合浦之地古為珠宮琦珍所聚掌握致富宜得廉吏為
之守長且蠻蜚荒遠難馴易擾非夫武壯智畧不能鎮
服以是數者推擇用汝祇蒞恩寵益思善效

皇城使漢州刺史廣南西路兵馬鈐轄張整等降

官添差監當

劉放

中國之所以臨撫戎蠻常以威位結服其心豈其夸於
殺人見小利而起後害乎爾等咸以選擢見任邊徼貪
於首功輕肆翦戮無辜橫死近二十人文書自營謾不
以實覆案究極惻然傷嗟宜正典刑以慰遐僻差奪官
秩用懲無狀尚體寬恩思自悔咎

吏部侍郎胡宗愈可御史中丞

劉放

權衡之於輕重繩墨之於曲直由其無私而素具是故
應物而不貳朝廷風憲之任忠謹之士亦所以素具而

待列位也命官之艱得人惟允具官胡宗愈秉心端直
為學深厚粹然特達之姿淵如有容之度粵自潤色綸
省獻納瑣闥副貳天官藻鑒多士綽有休譽舉為稱職
是宜付中司之權寄執法之柄爾其修胸中之誠應方
來之務有節於內則物無不察以義自處則動無不中
稱此茂恩著為顯效

承議郎克秘閣校理權判登聞鼓院張舜民可通

判號州

劉放

前以御史言事不合朝廷優容直臣未嘗備責故移位他局仍在轂下而舜民力自摧謝又以其多病及家婚要求得自便天道從欲而有曲成吾何怪焉號略要郡倅貳維重祗服恩寵毋怠勤恪

太常少卿趙瞻可戶部侍郎

蘇軾

理財正詞禁民為非曰義先王之論理財也必繼之以正詞名正而言順則財可得而理民可得而正自頃功利之臣言政而不及化言利而不及義中外紛然朕益

厭之具官趙瞻明於吏事輔以經術忠義之節白首不
衰爰自秩宗擢貳邦計將使四方之人知予以耆老舊
德居此官者蓋有益徹之意焉

鮮于侁可太常少卿

蘇軾

奉常之職非特以治郊廟之度服器之數而已國有大
政事大議論必稽焉昔魯秉周禮齊不敢謀而晏子太師
折衝於樽俎之間國之典常君臣之名分上下守之有
死不易則國安而民服朕選建卿士付之禮樂意在於

此非我老成之人學足以通古才足以御今智足以應
變彊足以守官深於經術達於人情其孰宜之詩不云
乎彼其之子邦之司直往修厥官無斁朕命

楊繪可知徐州

蘇軾

士有拙於謀身而巧於治民踈於防患而密於慮國其
自為計則過矣而朕何疾焉先帝龍興首擢用爾置之
臺諫以直諒聞言雖無功效於今日簡易輕信失之匪
人坐廢十年陶然自得詩人所謂豈弟君子者繪庶幾

馬彭城大邦吾股肱郡政成民悅朕不汝忘

揚王子孝騫等二人荆王子孝治等七人並逐州

團練使

蘇軾

先皇帝篤兄弟之好以恩勝義不許二叔出居于外蓋
武王待周召之意太皇太后嚴朝廷之禮以義制恩始
從其請出就外宅得孔子遠其子之意二聖不同同歸
于道可以為萬世法朕奉侍兩宮按行新第顧瞻懷思
潛焉出涕昔漢明帝問東平王在家何業為樂王言為善

最樂帝大其言因送列侯印十九枚諸子年五歲以上
悉帶之著之簡策天下不以為私今王諸子性于忠孝
漸于禮義自勝衣以上頌然皆有成人之風朕甚嘉之
其各進一官以助其為善之樂尚勉之哉母忝乃父祖
以為邦家光

呂公著妻魯氏贈國夫人

蘇軾

婦人之德如玉在淵雖不可見必形諸外視其夫有羔
羊之直相其子有麟趾之仁則內德之茂從可知矣具

官呂公著故妻魯氏名臣之子元老之婦所資者深故
志存乎仁所見者大故動協于禮環佩穆然閨門化之
而降年不永祿不配德其改封大國正位小君庶幾為
女史之光非獨慰其夫子而已

張恕將作監丞

蘇軾

朕惟人材之難長育之無素事至而求有不可得是以
訪之元臣大老之家推擇其子弟庶幾似之以爾名臣
之子篤學好禮敏於從政試之匠事以觀其能爾克遠

猷無忝乃父以稱朕意

李承之知青州

蘇軾

朕東望齊魯之國河岱之間沃野千里生齒億萬商農
阜通儒俠雜居可以大度長者服難以細謹法吏治也
具官李承之生于甲族世為名臣屢試有勞所見者大
肆予命汝尹茲東土昔曹參為齊相問治於其師蓋公蓋
公曰治道貴清靜而民自定汝師其言則予汝嘉

韓維父億贈冀國公

蘇軾

朕聞仁宗在位之久有同成康得士之盛不減武宣如
儲藥石以待疾病如種梓漆以備器用凡今中外文武
之選率多慶厯嘉祐之人而況一時之老成與聞當年
之大政德業傳於父老儀刑見於子孫名在國史像在
原廟朕用慨然想見其人具官韓維故父億少稟異材
進由直道出為循吏入為名卿福祿終身而人不疵富
貴奕世而天不厭實生三子翼輔兩朝旌旄交馳榮戟
互設朕欲賁其家廟而貴已窮於人爵改封大國益著

隆名庶使昭陵之老臣永為北土之藩輔

母蒲氏王氏贈秦國太夫人

蘇軾

慎終追遠仁也顯親揚名孝也得志行道澤可以及天下而富貴不能及其親天也雖不能及而追榮之典可以貫幽明褒大之訓可以表後世禮也嗚呼此亦仁之至義之盡矣具官韓維故母蒲氏王氏族為世望德為女師恭儉以相其夫嚴敬以成其子使朕獲老成之佐以濟艱難之功宜推異恩以報舊德

宋文鑑卷三十九

欽定四庫全書薈要卷一萬九千九百六十三

集部

宋文鑑卷四十

宋 呂祖謙 編

誥

蔣之奇天章閣待制知潭州

蘇軾

三后在上遺文在下炳若雲漢昭回于天乃眷藏書之府因為育材之地爰登秀傑以備顧問雖持節出使剖符分憂一掛名於其間遂增重於所莅且使民見侍從之出守知朝廷之念遠也具官蔣之奇少以異材輔之博

學藝而從政敏而有功使之治劇於一方固當坐嘯以終日勿謂湖湘之遠在余庭戶之間務安斯民以稱朕意

呂惠卿責授建寧軍節度副使本州安置不得簽

書公事

蘇軾

凶人在位民不奠居司寇失刑士有異論稍正滔天之罪永為垂世之規具官呂惠卿以斗筭之才挾穿窬之智諂事宰輔同升廟堂樂禍而貪功好兵而喜殺以聚

歛為仁義以法律為詩書首建青苗次行助役均輸之
政自同商賈手實之禍下及鷄豚苟可蠹國以害民率
皆攘臂而稱首先皇帝求賢若不及從善如轉圜始以
帝堯之聰姑試伯鯀終然孔子之聖不信宰予發其宿
姦謫之輔郡尚疑改過稍畀重權復陳罔上之言繼有
礪山之貶反覆教戒惡心不悛躁輕矯誣德音猶在始
與知己共為欺君喜則摩足以相歡怒則側目以相噬
連起大獄發其私書黨與交攻幾半天下姦賊狼籍橫

被江東至其復用之年始倡西戎之隙妄出新意變亂
舊章力引狂生之謀馴致永樂之禍興言及此流涕何
追迨予踐祚之初首發安邊之詔假我號令成汝詐謀
不圖渙汗之文止為款賊之具迷國不道從古罕聞尚
寬兩觀之誅薄示三危之竄國有常典朕不敢私

李南公知滄州穆珣知廬州王子韶知壽州趙揚

知潤州

蘇軾

刺史秩六百石以按列郡而治行卓然乃以二千石為

郡守昔以責人者今以自責則物被其惠民無間言爾
等皆嘗奉使督察官吏公明之稱達于朕聽董制江淮
控臨河海任亦重矣其益勉之無使風采減於平昔

李之純戶部侍郎

蘇軾

保國猶保身藥石不如養氣御民猶御馬鞭箠不如輕
車故興利以富民不如省事而民自富廣求以豐國不
如節用而國自豐朕嘉與庶工共行此志具官李之純
屢試以事號稱循良雖為有司不吝出納宜膺躡等之

用庶無虛授之譏服我訓詞以厭公議

謝卿材陝西轉運使

蘇軾

治邊者不計財惟邊之所用治財者不卹民惟財之為
富此古今之通患也朕知汝才智可倚忠厚可信故以
西方之政責成於汝往與帥守者謀之惟適厥中以民
為本

御史中丞劉摯無侍讀

蘇軾

孟子有言君仁莫不仁君義莫不義一正君而天下定

矣朕惟臺諫言責之臣雖知無不言常救之於已失而
勸講進讀之士蓋朝夕納誨故日化而不知合於孟子
正君之義非獨有司之事也具官劉摯以道事君非法
不言使朕日聞所不聞天下稱焉宜因古今書冊之成
文取其興壞治忽之要論言之於無事救之於未失使
朕立於無過之地豈非汝等臣之大願乎

皇兄右千牛衛將軍士昇轉官

錢勰

九廟子孫其麗蕃衍垂紳入侍悉以歲遷拱衛之嚴列

於督護尚惟敦睦以稱恩休

待制知青州鄧綰可龍圖閣直學士知永興軍

錢勰

雍州積高號稱陸海屏翰之重坐鎮西陲賢相所宜付
畀其選具官鄧綰資適逢世早踐禁途蕃宣回翔歲月
淹久學士通貴還陟近班帥守鎮臨往數寬詔服我休
寵無怠必懃

范育直龍圖閣知秦州

錢勰

古者不以勇猛為邊貴謀而賤戰故國家妙選耆儒
付方鎮外以訓齊戎旅而內以息安元元用此道也具
官范育才猷智略夙膺器任邊衆揆材往臨帥閫夫新
秦奧區控扼汧隴綏懷夷落應援新邦無以久安而忘
倘豫祗膺休顯益思報稱

劉敞秘書少監

錢勰

學者以東觀為老氏藏室道家蓬萊山而國家所以涵
養令器待材用者之宅也以爾敞詞藝之富回翔之久

擢貳厥官益將試用

正議大夫知樞密院事章某知汝州

錢勰

黜陟之典咸徇至公進退之間尚存大體具官章某
早繇法從亟預近司肆彼躁輕失於審重至于讐御之
列嘗通問遺之私比議役書本俾叅訂當其敷納初不
建明逮於宣行始興沮難務從含貸益至喧呶鞅鞅非
少主之臣硜硜無大臣之節稽參故實稍屈典刑噫朕

以幼冲仰煩慈訓苟乖恭事曷肅憲章其解政機往臨
郡寄弗忘循省服我寬恩

劉奉世起居郎孔文仲起居舍人 蘇軾

欲治國家當先得士頃者人物之評廢而長育之道微
朕顧瞻周行惻焉興歎或盤桓久次而未用或沉伏下
僚而莫知將以責成功折遐衝人不素具其何賴焉具
官劉奉世家世名臣才穎風發試以治劇煩而益明具
官孔文仲進以直言文史足用責之典禮守正不回斯

皆一時之俊良多士之領袖方欲寘之侍從益當養其
才能左右史官號為要地前後達者皆由此途手刊冊
書足以明枉直之效密侍殿陛足以觀進退之詳益勉
自修以須不次

陳烈落致仕福州教授

蘇轍

維孝友于兄弟是以為政爾以篤行見紀於東南雖老
而不試可以無憾朕方欲推爾所為施於鄉人其起視
學校使諸生有所矜式

蔡確改知安州

蘇轍

朕體貌大臣務全終始有善則藩飾褒顯以風勵天下有過則遷就諱避以曲全舊恩至於用法蓋不得已具官蔡確早以才力奮於下寮旋蒙器使致位元宰弟碩不類貪冒有素而溺於私愛以廢公議曲從舉吏之請遂成黷貨之辜其驕奢淫縱之狀理無不知而涵養蒙蔽之甚殆非體國致煩言之並作雖欲宥而不能黜守小邦仍褫舊職往自循省尚體至恩

侍御史林旦權淮南運副

蘇轍

淮甸之民荐罹饑饉乃者詔發倉廩輟吳楚之漕以拯
其急猶以乏食流徙達於朕聽朕惟救荒之術行之略
盡惟得良使者因事施宜為若可賴爾由郎官以才任
御史習於楊楚之故其為朕往視之均徭薄歛禁暴戢
姦無使斯人重被其困

郭達自致仕起知潞州

蘇轍

秦伯復用孟明是以能霸蜀人亟誅馬謖終亦無功朕

周於用人爲於求舊雖設干羽以懷柔異類而聽鞀鼓
則無忘將臣豈其舊勲久廢不用其官郭達蚤學弓劍
晚通詩書勇而有謀整且能暇威名懾於西鄙柄任及
於中樞南伐無成嗟伏波之遂棄退居能飯知廉頗之
未衰擢從解組之餘復寄長民之任過而能政豈一青
之足云窮當益堅或來功之可冀勉於圖報以稱異恩

范鎮侍讀太一宮使

蘇轍

爲國無強於得人用人莫先於求舊朕歷選賢俊至於

側微患其德望之未克而典刑之未練舍騏驎而不御
臨長道以咨嗟人皆病之予何疑者具官范鎮文冠多
士有揚雄之遺風任厯三朝守劉向之忠節蚤事仁祖
首開社稷之言晚說裕陵復陳堯舜之道自處以義歸
不待年身友漁樵已無求於當世名書簡冊恍或疑其
古人茲予纈服之初日思講義之益謂白首窮經之樂
尚可推以與人而真祠訪道之遊必使退而養志勉徇
予意毋留所安

莊公岳成都提刑蘇泌利州運判 蘇轍

守令賢否朝廷不能自知天下利病吏民不能自言宣
吾德澤於下而達民情於上者部使者也朕既選用舊
人而去其貪暴詔舉親進而汰其不以實者矣以爾公
岳久任刺舉所至稱治以爾泌家世文雅通於吏事益
利嶮遠民罹荼鹽苗役之害罷瘵未復朕念之深矣其
悉乃心謹察苛吏與民休息毋廢朕命

劉摯尚書右丞

蘇轍

漢御史大夫能任其職則為丞相近世中執法議論不撓亦補執政者我仁宗優養正士開受直言時則有若包拯張昇之流咸以敢言獲聞大政舊俗已遠此風寂寥容悅相承亦棄不用朕追懷先正選建忠賢諤諤之聲庶幾前烈具官劉摯蚤以御史祗事裕陵力陳是非不避權寵十年流落志氣不衰召置臺端首開正論進任中司之要屢聞白簡之言風聲凜然國是以定朕欲試其行事之實是用付以右轄之權治忽所關寄任尤

重夫以言責人甚易以義持己實難爾其勉之毋使輔政之功不若言事之效

太僕少卿李周秘書少監

曾肇

東觀以圖書為職長貳之選尤高非年耆德茂未易得也然秩清務簡處不爭之地恬於榮進則能安之好利夸侈者不能一朝居也具官李周質性純厚臨事有守厯試煩使時之老成位于列卿衆謂淹久進秩外史往服少事優游省闈不亦美歟

通議大夫賈昌衡正議大夫致仕 曾 肇

士大夫束髮起家白首辭位終始無悔人之所難豈無
褒嘉慰爾歸老具官賈昌衡名卿之裔以吏能進歷試
內外致位通顯優有風績號稱廉平上書引年願還印
綬嘉其知止足之誼閔爾有官職之勞序進文階以為
爾寵退安閭里益俾壽域

左武衛上將軍郭達特贈雄武軍節度使

曾 肇

今功隱卒國有彛章矧予勞舊之臣嘗處訃謨之地奄
終壽考宜極哀榮具官郭達少也知書長而甚武蚤著
戰多之績深通靜勝之謀伏波未衰尚威名之可億營
平既老亦籌策之是咨孰云注意之辰忽起云亡之痛
聽鼓輦而增感賜鉄鉞以飾終尚其有知膺此異數

正議大夫知鄧州蔡確復觀文殿學士差遣依舊

曾肇

法始於貴者所以示朝廷之公恩篤於舊臣所以為天

下之勸眷吾近弼嘗絃徽文雖符守之既更顧寵名之
尚關吏民安仰廉陞未尊具官蔡確材術疏通謀猷膚
敏與聞機政自元豐之紀年升冠宰司當永裕之復土
屬均勞於輔郡旋褫職於殿廬原情無他在法當復尚
淹時日以塞人言未忘矜念之心難廢公平之典倘顧
問於幃幄稍還近班宣條教於翰垣益思盡瘁

龍圖閣直學士朝議大夫御史中丞兼侍讀李常
中大夫依前龍圖閣直學士御史中丞兼侍讀

曾肇

有位而無官守有祿而無事責此階散所以無常員也
然必積日累年不惟罪悔有司銖寸校量應格然後一
遷亦已艱矣具官李常閤裕而靖深溫恭而諒直秉義
陪朕朝夕有恪蓋直延閣長憲臺侍經席皆儒學之華
選仕進之要地也人處其一以為寵榮爾今兼之其任
重矣茲又因其歲成進秩二等往服朕命職思其憂

蔣之奇寶文閣待制

曾肇

三聖圖書萃在延閣儒學之士列職其中諷議詩論維
時妙選雖身在江海之上而名近日月之光則世以為
榮任亦加重具官蔣之奇富以辭藝博知古今臺閣踐
更號為久次眷予南服付以列城屬愚民弄兵騷動嶺
表武夫利賞賊殺善民而爾應接經營多中機會有罪
就戮無辜獲申載嘉汝能宜用褒顯進于侍從之列不
改師帥之舊使遠人觀望益加二千石之尊為汝之光
不既多乎

御史中丞胡宗愈中大夫尚書右丞

曾肇

先帝稽古建官肇自三省維尚書萬事所出丞實總其
紀綱糾正官邪彌綸國典非通達治道剛毅有守烏能
勝其任哉具官胡宗愈明允篤誠敏于世用待時以君
子之器立朝有諍臣之風直筆正繩無所回撓開廣朕
意見弗欺之忠補助政體多可行之論斷自朕志擢貳
中臺躡進文階增峻堂陛唐太宗嘗謂尚書丞百職綱

維事一失中天下有受其敝者而當時魏鄭公戴胄劉洎輩迭處其位皆號得人今朕虛己仰成股肱是賴爾其矯正浮偽振肅偷惰使官修政舉有正觀之風則豈獨汝為稱職亦以副先帝作則垂憲之心可不勉哉

陝西運副呂大忠知陝府

曾肇

朕於用人不盡其力不奪其志均其勞佚欲臣下悅而知勸也爾以材諳久勤于外自陝以西兵食所賴而屢以疾告自請方州甘棠之郊姑遂爾欲坐嘯卧治安其

土風庶幾少休毋忘忠報

知洪州熊本知越州

曾肇

會稽西阻浙河東漸于海有陂湖灌溉之利故歲多順
成有絲枲魚鹽之饒故俗重犯法獄訟稀簡土風和平
置守牧人此為樂國具官熊本辭學起家果藝從政南
官西掖試用有聲番禺豫章循行可紀因爾能效委茲
重寄環地千里提封七州兵籍賦輿莫不無總名聯侍
從之列身寄牛斗之間是為寵榮益務報稱

朝奉郎石賡京東路提刑

曾肇

朕於用刑寧失有罪而歲報大辟有加無損意法網尚
密使民難避易犯歟抑吏之不良猶有遷情以就法者
歟故於臨遣使臣尤欲使知朕意以爾質厚而識明宜
能導民以遠罪哀矜而折獄矧齊魯之俗易與為善往
祇朕訓其盡爾心

契丹偽公主錫令結牟封夫人

曾肇

先帝威德覆被四方宜有遠人舉宗內屬優錫命數朕

其可忘某人生自大邦嬪于西土能慕聲教叩關請朝
引對在廷益嘉恭順胙之成國視古小君象掃翟衣以
為爾寵往帥種落舉為王民

范純禮復天章閣待制樞密都承旨

曾肇

樞機之地選用士人宣納密命自神考始肆予纂服收
拔端良寘諸左右蓋遵先志具官范純禮夷易有守篤
實無華恂恂自持言行相顧失職茲久秉心不移起分

州符未厭輿議其還延閣侍從之選來贊右府訐謨之
微副予咨求佇爾忠益

故降授太子少保致仕潞國公文彥博追復河東
節度管內觀察處置等使太師開府儀同三司
太原尹潞國公
曾肇

朕嗣位五月三下恩書徽纆桁楊棲置弗用放流竄逐
係踵生還尚念故老元臣嘗位丞弼或奪爵身後或殞
命貶中霈澤之行豈限存歿不有追復孰慰營魂具官

文彥博佐佑四朝勲德無茂粵自神考命為師臣逮及
先皇咨以重事去國未久噴有煩言降秩春宮僅存公
號齋志沒地屢閱歲時蔽自朕心悉還舊貫維垣印綬
冠秩百工全晉節旄視儀三事納書泉壤流澤子孫死
而有知可以無憾

東頭供奉官李志張大中並轉兩官

曾肇

朕圖疆場之功常以靜勝為優斬獲為下顧如爾等立

効西陲實在前日第勞行賞則有舊章其往自今當體朕意

尚書左丞梁燾資政殿學士同醴泉觀使

呂陶

君臣之會遇豈不難哉平居竭股肱之効則與之合謀一旦有筋力之憂則遂欲去位違從之際朕甚重之雖朝廷始終之恩固無所間而賢者進退之分亦貴其全爰有寵章以褒遠業具官梁燾蘊造道之深識知事君

之大方早以文學之望更直於儒林晚以諫諍之才盡
規於治路向從內相之選進領中臺之權資其納忠距
此周歲左網已舉知戴胄之有勞奇論不聞惜少翁之
告病遽形奏牘求解政幾章却復來至于五六爾既懷
知止之義屢請於朝予亦有優賢之心敢勞以事宜躋
華於秘殿仍它職於真宮示以眷存遂其安佚惟五福
之報德必錫之壽康惟大臣之憂君不繫於出處其綏
吉履益茂壯猷

李潛落致仕

鄒浩

朕欲士大夫風節奮厲以成一世之俗而忘己徇物或
者安之與其嚴法以示懲曷若表賢而自勸以爾自為
禮義行貫幽明歸卧鄉閭世所推尚精神思慮雖老不
衰近臣以聞適協朕意傳不云乎可以處而處可以仕
而仕孔子也爾既師之以治已有日矣勉承朕命以暢
遠猷

章綯同知樞密院

鄒浩

朕惟天下治安之本實在二府故文武雖若異任而眷
注未嘗不均必求其人以贊樞極具官章案受知哲廟
擢付師權既生致於首豪且廣恢於境土屢形捷奏數
被褒嘉眷宥密之須才越班聯而登用蔽自朕志寵示
殊恩惟不忍肝腦之塗郊原故能愛重人命惟簡見飛
輓之耗帑廩故能謹惜邦財事在變通爾知之矣勉思
所以善其後者以副朕濟民仁壽之意

呂希哲直祕閣知曹州

鄒浩

祕閣聚天下之圖籍以崇養豪英以鑒觀理亂惟時分
直不輕授人以爾學知所宗行與言稱方從卿寺而輔
藩垣茲用褒嘉以為爾寵夫濟陰患盜久矣以爾之不
欲而表勵之則雖賞之不竊將不特見於空言而已往
其懋哉

宋文鑑卷四十